



Áhyggjur af skólasókn nemenda

Stjórnendur og kennarar FG hafa miklar áhyggjur af skólasókn talsverðs hluta nemenda. Ef svo fer fram sem horfir verður sá hópur stór sem verður neitað um skólavist á næstu önn vegna slakrar skólasóknar og/eða slaks námsárangurs.

Vegna verkfalls kennara var nánast öllum nemendum leyft að halda áfram á haustönn 2014. Viðhorf skólans var að vorönnin væri sérstök vegna verkfallsins og því eðlilegt að sýna mildi hvað varðar framgang náms og skólasóknar á vorönn 2014.

Það er síðan ljóst að fjölmargir nemendur hafa álitnið að best væri að halda uppteknum hætti og sækja nám og skóla illa á haustönninni rétt eins og á síðustu vorönn. Þessir nemendur geta ekki vænst þess að fá skólavist á vorönn 2015. Skólanum er gert að fækka nemendum á árinu 2015 eins og flestum öðrum skólum. Það er ekki flókið að gera upp á milli nemenda þegar sumir þeirra hunsa ítrekuð tilmæli um skólasókn og ástundun.

Við munum í þessari viku senda út viðvörunarbréf vegna skólasóknar. Það má líta á það sem gula spjaldið. Ef ekki verður veruleg breyting á þá munum við í framhaldi sýna nemendum með slaka skólasókn rauða spjaldið og neita þeim um skólavist á næstu vorönn.

Aðsóknin að skólanum hefur aldrei verið meiri og þurftum við að vísa fjölda nemenda frá sem vildi hefja nám hér í FG. Það má spyrja sig af hverju neitum við þessum nemendum um að hefja skólagöngu hér þegar fjölmargir núverandi nemendur sinna námi illa.

Reglur skólans um skólasókn eru skýrar og má sjá þær hér á næstu síðu. Ennfremur eru þær á [heimasíðu skólans](#).

Þetta er samt ekki eintómt svartnætti fjölmargir nemendur sækja skólann vel og sinna náminu jafnvel enn betur. Óneitanlega er það svo að of mikill tími stjórnenda og kennara fer í að berjast við nemendur sem geta mjög vel lært en kjósa að gera það ekki. Hafið í huga að þegar upp er staðið þá er slök skólasókn og rýr árangur í kjölfarið vandmál nemandans og heimilsins en ekki skólans. Auðvitað viljum við ekkert frekar en að nemendur nái árangri og viljum allt gera til að svo fari. En við gerum þetta ekki ein. Ef nemendur leggja sig ekki fram verður árangurinn enginn.

Afmæli skólans

Fjölbrautaskólinn í Garðabæ er 30 á þessu skólaári. Skólinn sem byrjaði sem Framhaldsdeildir Garðaskóla er nú 800 nemenda skóli og einn af stærri skólum landsins með fjölbreytt og metnaðarfullt námsframboð. Eftirsókn eftir skólavist er mikil og þurftum við að vísa frá fjölda nemenda í umsóknarferlinu síðasta vor.

Nemendur og starfsfólk héldu upp á afmælið 10. september með fjölbreyttu sniði. Veðrið gerði okkur skráveifu og var dagskráin utan húss heldur snubbóttari en til stóð. Gleðin var samt mikil og lögðu margir hönd á plóg. Grillað var ofan í viðstadda og tónlist var á boðstólum. Hápunkturinn var ræðukeppni milli fyrrverandi og núverandi nemenda og var rætt um hvort skólinn væri betri í dag eða áður. Ræðurnar voru góðar en samkvæmt óvilhóllum dómara, núverandi skólameistara, sigruðu núverandi nemendur með yfirburðum. Sjá má myndir af afmælinu á [fésbókinni](#).

FG – FRÉTTIR

5. tbl. 31. árgangur

30. sept. 2014

Ábm. Kristinn Þorsteinsson

Skólasóknarreglur Fjölbrautaskólans í Garðabæ

1. Sækja skal allar kennslustundir stundvíslega.
2. Komi nemandi of seint í tíma fær hann skráða á sig seinkomu. Séu liðnar 15 mín. af kennslustund þegar nemandi mætir fær hann skráða á sig fjarvist.
3. Veikindi, samfellt í tvo daga eða skemur, lækka skólasóknarprósentu nemenda.
4. Veikindi skal tilkynna hvern veikindadag **fyrir kl. 11:00** og staðfesta skriflega ef um veikindi lengur en tvo daga er að ræða. Staðfestingin skal undirrituð af foreldri, öðrum forráðamanni eða lækni ef neminn býr enn í foreldrahúsum – og gildir þá einu þótt hann sé orðinn 18 ára. Ef það gengur ekki þarf annan fullorðinn einstakling til að votta veikindin. **Ekki er hægt að skrá veikindi sem vara skemur en heilan skóladag.**
5. Þrálát og/eða langvinn veikindi skal staðfesta með læknisvottorði sem skilað er á skrifstofu skólans. Slík vottorð skal endurnýja á hverju skólaári.
6. Skólasókn, að frádregnum staðfestum veikindum (þ.e. umfram tvo fyrstu daga veikinda), skal vera 87% hið minnsta. Að öðrum kosti eiga nemendur ekki vísa skólavist á næstu önn. Sé skólasókn ábótavant er veitt skrifleg áminning.
7. Fari skólasókn niður fyrir 85% má vísa nemandanum úr skóla.
8. Ein fjarvist jafngildir einu fjarvistarstigi.
9. Seinkoma jafngildir 0,5 fjarvistarstigum.
10. Einkunnir fyrir skólasókn:

97,5 – 100% = 10 ein eining

95,5 – 97,4% = 9 ein eining

93,5 – 95,4% = 8

90,5 – 93,4% = 7

88,5 – 90,4% = 6

86,5 – 88,4% = 5

84,5 – 86,4% = 4

81,5 – 84,4% = 3

79,5 – 81,4% = 2

<79,4% = 1

- Nemendur sem stríða við langvinn veikindi þurfa að skila læknisvottorði á hverju skólaári. Tekið er sérstakt tillit til þrálátra veikinda. Einnig er tekið sérstakt tillit til nemenda sem verða mikið veikir eða þurfa að fara oft til læknis. Það er fólgið í því að nemendur geti sótt um **niðurfellingu veikinda í síðustu kennsluviku** annar þannig að skólasókn þeirra verði endurskoðuð með tilliti til skráðra veikinda og/eða læknisheimsókna. Þetta er eingöngu gert ef skólasókn nemenda er að öðru leyti óaðfinnanleg. Miðað er við að gengið sé frá öllum málum varðandi skólasókn við lok viðkomandi annar.
- Mjög mikilvægt er að nemendur og forráðamenn fylgist vel með mætingum til að komast hjá því að fá áminningu, brottvísun og/eða höfnun á skólavist á næstu önn. Nemandi sem ekki nær 87% skólasókn á ekki vísa skólavist á næstu önn. Slík skólasókn gæti jafngilt því að nemandinn væri fjarverandi um tvær vikur á önninni. Nemanda sem mætir minna en 85% er heimilt að vísa úr skóla.
- Allir forráðamenn nemenda yngri en 18 ára fá aðgang að upplýsingakerfinu INNU. Þar er tækifæri til að fylgjast með skólasókninni og mikilvægt að hafa samband við skólann sem fyrst ef eitthvað er óljóst.
- Nemendur sem mæta vel geta unnið sér inn námseiningar. Nemendur sem fá 9 eða 10 í skólasókn fá eina einingu á önn, að því tilskildu að raunmæting sé yfir 89%, sem fer í val á öllum námsbrautum. Nemandi sem mætir mjög vel í fjögur ár fær þannig 8 einingar í val fyrir það eitt að mæta; auk þess sem hann nær líka oftast betri árangri í námi.
- Ef nemendur þurfa leyfi frá kennslustundum skal sækja um það til skólaráðs. Leyfi vegna keppni eða ferðar á vegum íþróttafélags er veitt ef staðfesting frá þjálfara liggur fyrir. Ef nemendur þurfa leyfi vegna annarra ferða er það skoðað og síðan afgreitt í lok annar á þann hátt að ef skólasókn er óaðfinnaleg að öðru leyti er leyfið veitt í flestum tilfellum.
- Leyfi vegna jarðarfara og kistulagningar er veitt eftir að fyllt hefur verið út eyðublað þar að lútandi sem fæst á skrifstofu skólans.
- Skili nemandi inn staðfestingu á fjarvist sinni t.d. ef hann fer til tannlæknis, í ökuþróf eða sjúkrahjálfun fær hann skráða útskýrða fjarvist (T) þar sem fram kemur ástæða fjarvistar.
- Ef nemendur vilja gera athugasemd við fjarvistaskráningu sína verða þeir að koma henni skriflega til viðkomandi kennara sem leiðréttir ef þörf krefur. Ekki er hægt að leiðrétta fjarvistir lengra aftur í tímann en sem nemur tveimur vikum og gildir þá einu hvort komið er með vottorð eða ekki.